

For di ayera

Ruben Goedhoop no ta Director mas di AZV

DESPUES di un negociacion entre Ruben Goedhoop, den su calidad di Director di AZV, e partidonan a yega na un acuerdo mutuo, cu for di ayera e no ta sigui mas como Director di e compania di seguro medico general. Hunta di Supervision a bay di acuerdo pa nombra ir. Edwin Jacobs, actual Director di SVB den dicho funcion temporalmente.

Manera ta conoci, den ultimo fin di siman a tuma e decision pa suspende e director. E ta relaciona cu un contract cu el a sera cu un compania pa transporte di pashentnan. A tum'e na malo pasobra e mester a yuda baha gastonan di AZV cu 5 miyon florin pa luna, manera Hulanda a bin ta demanda.

Pa evita cualkier duda, e terminacion no ta implica cu tabatin actonan fraudulentu bou di investigacion. Partidonana finalisa e acuerdo di trabou di mutuo acuerdo entrante ayera. A gradici Ruben Goedhoop pa su trabou, dedicacion y contribucion n'e Organo Ejecutivo AZV y a dese'e tur exito den su futuro proyectonan y liderazgo.



Abogado mr. Dello Gomez a represente Minister Dangui Oduber y Hunta di Supervision di AZV den e negociacion. Gobierno a hay'e ta paga Goedhoop un compensacion, maske cu nan ta nenga cu esaki tabata un "golden handshake".

Y manera menciona mientras cu ta trahando riba e procedura pa yega na un persona cu lo tuma su lugar, ir. Edwin Jacobs, Director di SVb, ta sigui maneha AZV como Director interno. E lo combina e funcion cu esun otro di Director di SVb. Esaki ta loke cu e Hunta di Supervision a informa den un comunicado.